

四川府縣志輯

(新編)

47

中國地方志集成

同治仁壽縣志

# 中國地方志集成

四川府縣志輯（新編）④7

同治仁壽縣志

巴蜀書社·鳳凰出版社·上海書店

# 第四十七册目錄

同治仁壽縣志……………

治同

仁壽縣志

清·羅廷權等  
同治五年刻本

修 馬凡若 纂  
十五卷首一卷

仁壽縣志序

仁壽縣治之設自周秦漢魏以迄於今其間稱名既異而建置之地與隸屬之州郡又多不同故山川人物及古蹟之所在任紛錯出非合前代之書參互考訂不足以傳古即不足以信今也明矣我

朝深仁厚澤太和翔洽凡生

仁壽縣志序

一

斯世者無不共登於仁壽

之域是以山川鍾靈人物茂豫或於數年間應瑞而生者以久而益積茲壽而隆網舉目張以垂諸久

仁壽縣志序

二

遠則甚賴於有志而縣志之修所繫者為綦重也余於同治四年謁送以仁壽令到省奉委署石泉縣事觀其舊志以為采輯

而增補之六閱月即奪檄  
回修以是不果比至斯邑  
適值修志初成凡為志九  
一一皆成卷帙急取而閱  
之斯邑毘連十三州縣幅

員察潤而一覽之餘大略  
已在胸中至於食貨禮教  
諸志又復釐然可考而一  
山一水一櫓一鎮綴以古  
今雜詩夫志之綴以詩也

於他志不概見斯志之有詩  
或亦以備將來之採風歟  
志之成秉筆則馬伯枚  
先生鑒定則前任羅鑑平  
先生濮鉅卿先生志中

體例已畢述矣余又何言  
卦竊以邑中之山川形勢  
民情風俗之所閱而食貨  
禮教諸志則又以古以卷  
為治之本源所造出者也

不悉其故則雖日事誌於  
於堂而曰為軍之道已在  
是豈將所以洞然而徹於  
心乎時余將巡歷各鄉  
於斯邑地方所以細加審

仁壽縣志序

五

視其與志中必有歷之不  
爽者因幸斯志之成余  
尚得逢其盛事用弁數  
言於篇首

同治五年十一月山左

王履興芋園氏撰



仁壽縣志序

六



仁壽縣志序

治縣有譜志一譜也輿地之所在食貨之所繫禮教之所垂武衛之所周防選舉之所奮興以及人物茂止藝文炳如古今勝蹟前後歷官莫不徵實考信於志乎在仁壽經舊志新志後垂三十年前令羅鑑平先生謀三修之秉筆付之前慶符縣訓導邑孝廉馬伯枚先生伯枚蜀老名士其為志也九潔而賅嚴而精確一切瑣屑奇怪為志餘余下車急欲蕝事公餘細加鑒定用付剞劂庶覽者得所徵信云同治四年十二月江左架卿濮

仁壽縣志

卷首序

琮撰

仁壽縣志序

余以同治二年癸亥秋七月奉檄署仁壽縣事甫下車取縣舊新志觀之舊志如初脫稿草創大段搜引宏富新志藝文刪去稍多山水亦不甚確溯查又歷二十餘年無志中之典禮武廟金文昌宮均升中祀學額賑法公局鄉團人物諸大端增加於舊又自咸豐十年十一年來李逆竄境兵刑工房案卷悉火何論三鄉一切久且湮沒無傳比冬兩奉 藩憲劉札開重修四川通志飭縣造志賫送縣繁難又初擾後剔弊剷蠹休息又一年餘既修復

仁壽縣志

卷首序

二

聖廟 武廟 奎閣昭忠祠成隨以考棚餘地無案

証據舊志載碁詳縣士紳有修志之請四年乙丑斷以舊新志合道光戊戌以迄同治甲子二十九年事故徵之在官在民都為一志會前慶符訓導邑孝廉馬伯枚先生引疾還山有年一以筆削之權付之伯枚蜀都名宿與余為大挑同年其主修縣志體例精嚴敘次明潔純乎史筆抑識力為獨到已公餘一一鑒定命縣人錄板印紙播諸將來以備考證云同治四年歲在乙丑三月古滇羅廷權鑑平氏撰

仁壽縣志序

縣舊新志二舊志叛於姚一如先生而李太初先生成  
之事在嘉慶六年道光丁酉馬夢九先生踵為新志今  
又二十九年 前年大憲以修通志令於縣時羅鑑平先  
生視縣事先生<sup>上</sup>某同年方年餘翕然稱治縣人故稟請  
某主修縣志先生作內江故修內江志既廣元將修廣  
元志旋署仁壽迺毅然隆禮聘某是用三修都為一志  
終同治四年乙丑<sup>某</sup>則謬焉秉筆於舊新志頗有增損  
更正體例所不敢仍志史也非信有徵不書所謂討古

仁壽縣志卷首序

三

宜密引今宜嚴義例宜慎辨論宜確簡而明疎而不漏  
俚言質事各以類從宜存警訓古者七十子不與筆削  
筆削而魯史逸乃為縣志始輿地奠官民也然後官之  
政教民之生聚斯出次志食貨云養次志禮教云教猶  
未也又禦亂有武衛志又興賢有選舉志於是乎獻可  
考矣人物斯志文可徵矣藝文斯志若乃勝蹟志焉一  
縣之大何不有無關治體之要官名志焉一縣之治咸  
所事用知去後之思凡九志中載

上論

宸翰部頒所以示尊崇終之曰志餘者固存而不論意也

此三修志大指抑其為志九也舊志不載分野若沿革  
則可詳疆域山水為城池關津所由設而官署公局鄉  
甲場若橋在焉形勢附圖附則有戶口不可不為之所  
保甲附由是物產斯出田賦未加若其鹽政雜課三費  
肉釐附捐輸畱支驗解書役費規附均未為民間病而  
備荒則有倉儲贍窮則有養濟加惠則有蠲郵權宜而  
為社田賑法抑又一道濟倉田查封田社倉田養濟田  
三費田附大典朝賀迎春若壇廟祀典所垂凡社稷壇

仁壽縣志卷首序

四

風雲雷雨山川壇先農壇耕藉附聖廟崇聖祠四配十  
二哲兩廡先賢先儒名宦鄉賢忠孝昭忠節孝祠附武  
廟後殿附文廟後殿附城隍廟龍王廟火神廟呂真君  
廟厲壇及雩祭祭祭救護日月不得與羣祀比若旌表  
風教所係凡舉人坊進士坊郎官坊黃門坊光祿坊丞  
相坊及節孝烈婦貞女孝子義夫坊百歲五世同堂坊  
不得與他坊比二者皆列禮教與宣講

聖諭十六條申明亭明倫堂學規學額鄉飲酒禮書院書  
院田附義學經費附考棚演武廳賓興杏林庄附宗祠

風俗同志營制鋪遞皆兵團練皆民經常變所不廢合之以居以食以教皆官民重大事而薦辟進士舉人貢生之蔚起於養教之餘亦其自然之勢諸生行伍俊秀吏員附人物除現在該報貞節孝義外蓋棺論定若名臣宦業儒林文苑孝友愚孝附忠節行誼義夫隱逸仙釋方技耆壽列女諸人論列誌銘附藝文志已故縣人之文現在縣人非是縣人不與其有關一縣之地人之事與非縣人關縣之作同載本條作據更不以藝文論亦無論其人存否若已故縣人書目詩文正不於縣

仁壽縣志

卷首序

五

關係特其筆墨精靈信今傳後擇其尤雅數篇所謂文獻名邦勝蹟亦足不朽如遺址碑坊磨巖樓閣園亭塔祠寺冢墓器象無久近皆成古蹟縣前代職官不同國朝宰官爲知縣教官典史汎弁咸同城官異蹟附是九志小目例也若夫舊乘存疑先賢軼事遠矣天文譁焉祥瑞反乎常而災異逢其變而禍亂以至神怪茫茫報施鑿鑿流傳舊矣爲志餘總爲卷十五共一千二百餘頁卷首目錄二頁原序五頁新序六頁卷末跋五頁非斬勝舊新志草創未就鑑平先生調成都縣接署

濮矩卿先生更相鑒定歲事時同治四年八月伯枚馬凡若撰

仁壽縣志

卷首序

六

仁壽縣志序 李惺代

馬君夢九輯仁壽縣志釐為八卷其曰新志者別乎舊志而名之也一志耳何以有新舊則亦唐書之例也唐書為劉昫所撰自宋祁修之而新舊以分志雖與史異然古曰郡書或曰都邑簿其源皆出於史氏則志與史固無異也仁壽之有舊志權輿於姚一如方伯而成於邑令李君太初事在嘉慶年間迄今已三十餘年矣馬君之言曰舊志年代多舛名宦人物亦間有遺漏至於水利其輻輳謬戾也尤甚然則新志之作又烏能已乎

仁壽縣志 卷首序

七

夫後人非斬勝於前人而前人不能無待於後人者何也有所絀也舊志亦井井有條理而缺畧紕繆之弊不一而足難稱完善今得馬君為之訂其偽而補其罅則後人實有功於前人而為之前者其亦可以無憾也夫馬君有幹局其治邑事也如其家事而此志之修尤有裨於治理蓋一邑雖微至舉地方之利病風俗之滄澆與夫官於斯者之孰賢孰否欲使之有所觀感是必使之有所考鏡而志則得失之林也人心之所以正政教之所以成未始不由於此余懼夫弊弊者之第以簿書

期會為能而於制治之原或概乎其未有聞也爰書此以應馬君並以為來者勗焉道光戊戌周貽徽序

仁壽縣志 卷首序

八

仁壽縣志序

陞任觀察姚一如先生乾隆五十四年知縣事纂邑乘未及成書越十餘年余權縣篆其友邵冷塘將原纂稿示別有數百條於人物尤詳不兩月用發新例備書欽奉

宸翰

御製

上諭

恩詔及部頒各祀典冠首乃若星象非一邑之專照亦天

仁壽縣志

卷首 序

九

文所當秘密者祥異之惑民寺觀之崇淫祀皆所無取土產擇其有關於邑者書之風俗隨長吏為轉移苟喪葬婚娶不合乎禮儀又非所以風世也藝文各附其類編經籍槩乎藝文矣原纂標書名雙行續纂質所疑備一家作同纂學博嚴賡唐姚芝礎縣尉孫君達邑孝廉汪天懷鄒邁皇劉青選共參焉嘉慶七年京山太初李元書

仁壽縣志序

縣之置始自後魏而改普甯為仁壽則在隋時其後或屬陵州或屬成都府至我

朝改屬資州固西蜀之名區也

國家仁風翔洽休養生息歷百數十年田疇之懇闢戶口之殷繁官師人物之才者能者與夫鄉賢潛德閭閻幽貞誼諸掌故零落莫詳焉夫周官土訓掌道地圖以詔地事誦訓掌道方志以詔觀事蓋將使來者有考也守土而不畱心志乘甯非闕歟京山渾齋李君以南充宰

仁壽縣志

卷首 序

十

權仁壽事甫下車即修葺文廟經理鄉賢祠基爛於吏治政通人和謂邑不可無志取舊纂續纂之衷陳編添新得參考互訂粲然美備詳搜何文績虞忠肅之紀傳而忠烈長昭備錄孫葆光韓子蒼之詩詞而遺音不墜慨通志之多誤也為之正三隅山之名闢落馬巖之誣辨蟠溪赤水之實為一流稽始建廢縣之當屬仁邑於選舉則核宋時之籍貫於人物則補李新員興宗之姓名若此之類余向嘗見及之而刊偽正謬渾齋言余之所未言實言余之所欲言也昔司馬溫公嘗稱宋次

道長安河南二志雖因韋述舊記而詳不啻十餘倍歎  
 爲博物書余其敢追蹤韋述哉若渾齋之書誠博物矣  
 壽之梨棗昭示將來自茲陵陽文獻庶有徵乎抑余更  
 有念焉邑處崇岡積巘之間幅幘遼廣深賴循良之吏  
 躋民於仁壽稽戶版當知撫綏之匪易也覽塘堰當籌  
 水庸之盡復也策科名覩習俗當思禮教之宜先而振  
 興之宜力也凡此用心已寓於渾齋意園一記卽景會  
 神緣情立政此中有真意生斯宦斯者不皆可以意逆  
 耶余旣樂觀新志之克成竊愧曩者所纂之多疎陋也

仁壽縣志

卷首序

十一

是爲序嘉慶八年癸亥雲間姚令儀并書

仁壽縣志目錄

卷一

輿地志 沿革 疆域 附形勢 山水 附壩洞石 城池 官署 關津 圖附

卷二

食貨志 戶口 附保甲 物產

卷三

食貨志 田賦 鹽政 雜課 附三費肉釐 附 支 附驗解書役費規 倉儲 附濟倉 田查封田社倉田三費田 養濟院 附 養濟田 附賑飢 蠲政

卷四

仁壽縣志 卷首 目錄

一

禮教志 朝賀 迎春 祀典 宣講 附申明亭

卷五

禮教志 明倫堂 書院 附書院田 義學 附 義學經費 鄉飲酒禮 考棚 演武廳 賓興 附杏林庄 坊表 宗祠 風俗

卷六

武衛志 營汛 舖遞 團練

卷七

選舉志 薦辟 進士 武進士 舉人 武舉 貢生 附諸生 行伍 俊秀 吏員

卷八

人物志 名臣 宦業 儒林 文苑 孝友

卷九

人物志 忠節 行誼 義夫 隱逸 仙釋  
方技 耆壽

卷十

人物志 列女

卷十一

藝文志 書目 前代詩文

卷十二

藝文志 國朝詩文

仁壽縣志 卷首 目錄

卷十三

勝蹟志 遺址 碑坊 磨崖 樓閣園亭塔  
祠寺 冢墓 器象

卷十四

愍官志 前代職官 國朝知縣 教官 典史  
汎弁

卷十五

志餘 存疑 軼事 天文 祥瑞 災異 賊亂  
神怪 報應 附補遺

仁壽縣志卷一

輿地志 沿革 疆域 附形勢 山水 壩洞石附  
城池 官署 關津 圖附

沿革

禹貢梁州之域漢犍為郡武陽縣東境屬益州部

李元注縣在周為蜀國地秦為武陽縣地縣治在今

彭山縣東十里距蜀郡百餘里當屬蜀郡漢高帝分

巴蜀置廣漢郡武帝分巴廣漢置犍為郡縣始改隸

孝昭帝犍為郡治移武陽東界資中西抵臨邛北接

廣都南通南安盡今仁井眉彭四州縣地今西北境

仁壽縣志 卷一 輿地志

廣都也

晉置西城戍

晉孝武太原中益州刺史毛璩置西城戍以為捍衛

梁置懷仁郡天監中立席郡

西魏置普甯縣蒲亭縣屬懷仁郡普甯縣為州郡治置

和仁郡平井貴平可曇三縣後周置陵州置籍縣廢可

曇平井二縣入貴平

隋開皇三年罷席郡為籍縣以普甯屬陵州十年置始

建鎮十八年改普甯曰仁壽縣大業初廢籍縣入貴平

廢蒲亭改井研廢州爲隆山郡統縣五仁壽貴平井研始建隆山五年改始建鎮爲縣

唐武德元年復隆山郡曰陵州九年割隆山屬眉州永徽四年分貴平置籍縣屬陵州天寶元年改曰仁壽郡乾元元年復爲陵州屬劍南道

唐元宗諱隆基改隆山郡爲仁壽郡

宋至道三年陞州爲團練使咸平四年廢使爲州並廢始建縣爲鎮熙甯五年廢州爲陵井監廢貴平籍縣入廣都宜和四年改陵州監爲仙井監隆興五年改監爲

仁壽縣志 卷一 輿地志

二

隆州乾道六年復置貴平籍縣屬仙井監

陵井監圖經漢張道陵經此地有山神稱十二女指

陵上開鹽井監以陵名志地也文同謂因張陵以名

井復因陵井以名州大觀四年改名仙井避其諱云

元憲宗時廢貴平籍縣入仁壽至元二十年廢陵州以

縣屬成都府至元中廢井研入仁壽後復置

明仁壽縣屬成都府洪武十年廢井研入仁壽後復置

國朝雍正五年仁壽縣改屬資州

輿地志

疆域 附形勢

縣治在成都省城東南一百九十里州西北二百六十五里四境北華雙新眉南威榮井相去三百里間西彭青東簡陽資羅相去二百里間治在三隅山間適居中東距廖家灣一百二十五里接資州界又一百四十里抵資州治又東距青龍場一百六十五里接資州羅泉井界又三十里抵羅泉井州判署又東距鎮金橋一百里交簡州界又八十里抵簡州治又東距茨笆坳一百

仁壽縣志 卷一 輿地志

三

二十里交資州界又交資陽界又六十里抵資陽治南距分水嶺一百七十五里交威遠縣界又一百二十里抵威遠治又南距復興場一百五十里交榮縣界又十里抵榮縣治又南距界牌舖九十五里交井研縣界又二十里抵井研治又西距河壩子六十五里交青神縣界又四十里抵青神治又西北距分水舖二十里又十里至土地坎又三十里至黃豐場交彭山界北距光相場四十里交眉州界又三十里抵眉州治又北黃豐場六十五里交彭山縣界又三十里抵彭山治又北距嘉



禾莊一百三十里交新津縣界又六十里抵新津治又北距華嚴寺一百二十五里交雙流縣界又二十里抵雙流治又北距秦皇寺一百四十五里交華陽縣界又七十里抵華陽治縣境自府河蘇馬頭場街半屬華陽半屬仁壽距治一百六十五里河分東西河東徑上山至秦皇寺場華陽仁壽連界距治一百五十里下至尖茶溪場距治一百三十里石滾河高店子仁壽界左轉大林場距治一百二十里直上大山馬跑泉山東仁壽界山西華陽界向北徑至單頭山簡州華陽仁壽三仁壽縣志

卷一 輿地志

四

馬頭場府河西華陽東仁壽直下八里奉國寺十六里古紅花場二里道士溪二里古佛洞府河西仁壽界距治一百二十里越牧馬山彭山界沿河下五里嘉禾莊與彭山縣河分東西河以東仁壽界八里黃龍溪錦江匯岷江半邊街雙江口場抵彭山界越小山一路抵眉州界至光相寺距治六十里與眉州連界下至龍居場亦與眉州連界至河壩子場場街半屬青神半屬仁壽徑上大山周家坡前下山石馬寺高河坎三十里仁壽井研界牌近觀音橋十里距治九十里轉至迴龍場與仁壽縣志

卷一 輿地志

五